



Na osnovu člana 18. Poslovnika Centralne izborne komisije Bosne i Hercegovine ("Službeni glasnik BiH", br. 29/18 i 25/20), a u vezi čl. 3.6 i 5.22 Izbornog zakona Bosne i Hercegovine („Službeni glasnik BiH”, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20), Centralna izborna komisija Bosne i Hercegovine je na 68. sjednici, održanoj 19.10.2020. godine, donijela

**ODLUKU
O POSTUPANJU CENTRALNE IZBORNE KOMISIJE BOSNE I HERCEGOVINE
SA CILJEM OSIGURANJA TAČNOSTI, AŽURNOSTI I INTEGRITETA IZVODA
IZ CENTRALNOG BIRAČKOG SPISKA ZA GLASANJE IZVAN BOSNE I
HERCEGOVINE KAO I SPREČAVANJA ZLOUPOTREBA U VEZI S GLASANJEM
IZVAN BOSNE I HERCEGOVINE**

**Član 1.
(Predmet)**

Predmet Odluke o postupanju Centralne izborne komisije Bosne i Hercegovine (u daljem tekstu: Centralna izborna komisija BiH) sa ciljem osiguranja tačnosti, ažurnosti i integriteta izvoda iz Centralnog biračkog spiska za glasanje izvan Bosne i Hercegovine kao i sprečavanja zloupotreba u vezi sa glasanjem izvan Bosne i Hercegovine (u dalnjem tekstu: Odluka) je utvrđivanje procedura postupanja Centralne izborne komisije BiH po žalbama, prijavama eventualnih zloupotreba i pristiglim informacijama koje se odnose na Izvod za glasanje izvan Bosne i Hercegovine, a sve sa ciljem osiguranja tačnosti, ažurnosti i ukupnog intergriteta Centralnog biračkog spiska, čiji je sastavni dio Izvod za glasanje izvan Bosne i Hercegovine, odnosno sprečavanje zloupotreba kod brojanja i utvrđivanja rezultata u Glavnom centru za brojanje.

**Član 2.
(Postupanje po žalbama, prijavama i informacijama)**

(1) Odlukom o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine broj: 05-1-07-1-997/20 od 01.10.2020. godine utvrđeno je da se na izvodu iz Centralnog biračkog spiska za glasanje izvan Bosne i Hercegovine koji će se održati 15.11.2020. godine, nalazi 101.771 birač.

(2) U cilju sprečavanja zloupotreba u vezi sa glasanjem izvan Bosne i Hercegovine kao i osiguranja tačnosti, ažurnosti i integriteta izvoda iz Centralnog biračkog spiska za glasanje izvan Bosne i Hercegovine, Centralna izborna komisija BiH po hitnoj proceduri postupa po zaprimljenim žalbama protiv Odluke iz stava (1) ovog člana.

(3) Po svim žalbama dostavljenim do 03.10.2020. godine do 24.00 sata, Centralna izborna komisija BiH kao prvostepeni organ, postupa na sljedeći način:

- Ukoliko podnesenom žalbom birač tvrdi da nije podnio prijavu za glasanje izvan Bosne i Hercegovine, zahtjevajući da se vrati na redovno biračko mjesto, utvrđuje se da li je žalba osnovana i potkprijepljena izjavom sa potpisom ovjerenim od strane nadležnog organa, ili drugim, nepobitnim dokazom, te ukoliko se utvrdi da je žalba

osnovana, odnosno da su žalbeni navodi dokazani, Centralna izborna komisija BiH žalbu uvažava, a birača briše iz Izvoda za glasanje izvan Bosne i Hercegovine.

b) Ukoliko podnesenom žalbom birač tvrdi da je podnio prijavu za glasanje izvan Bosne i Hercegovine, a da je odlukom Centralne izborne komisije BiH odbijen sa zahtjevom za glasanje izvan Bosne i Hercegovine bez obzira na razlog odbijanja, Centralna izborna komisija BiH utvrđuje da li je žalba, izjavljena od strane ovlaštene osobe, osnovana i potkrijepljena odgovarajućim i nepobitnim dokazom kojom taj birač potvrđuje svoju adresu boravišta u zemlji izvan Bosne i Hercegovine koju je naveo u prijavi za glasanje izvan Bosne i Hercegovine. Ukoliko je žalba osnovana, te potkrijepljena dokazima, vrši se registracija birača sa adresom boravišta u inostranstvu koja je u žalbenom postupku dokazana.

(4) Po svim prijavama za glasanje izvan Bosne i Hercegovine, za koje je u postupku postupanja po žalbama iz stava (3) ovog člana utvrđeno da ukazuju na eventualnu zloporabu osobnih podataka birača sa sumnjom na počinjeno krivično djelo, postupa se u skladu s članom 6.8 stav (2) Izbornog zakona BiH.

(5) Sve blagovremene žalbe koje Centralna izborna komisija BiH u smislu člana (3) ove Odluke ocijeni neosnovanim, uz izjašnjenje se prosljeđuju na postupanje Sudu Bosne i Hercegovine.

(6) Sve osnovane žalbe dostavljene izvan roka iz stava (3) ovog člana koje su potkrijepljene odgovarajućim dokazima, Centralna izborna komisija BiH tretira kao informacije kojima se ukazuje na netačnost Izvoda za glasanje izvan Bosne i Hercegovine, te po službenoj dužnosti postupa u smislu stava (3) ovog člana.

(7) Sve neblagovremeno dostavljene žalbe, koje po ocjeni Centralne izborne komisije BiH nisu osnovane u smislu stava (3) ovog člana, Centralna izborna komisija BiH, odbaciti će kao neblagovremene.

(8) Na postupanje po prijavama, analogno se primjenjuju odredbe ovog člana.

(9) O svim uvaženim žalbama iz stava (3), informacijama iz stava (6), te prijavama iz stava (8) ovog člana, Centralna izborna komisija BiH, vodi posebnu evidenciju.

(10) Evidencija iz stava (7) ovog člana pored podataka iz člana 3.10 Izbornog zakona BiH za birača na kojeg ukazuje žalba, prijava ili informacija, obvezno sadrži i datum zaprimanja žalbe, prijave ili informacije sa rubrikom „Napomena“ u kojoj Sektor za opšte i pravne poslove u Sekretarijatu Centralne izborne komisije BiH upisuje ishod postupka po žalbi, prijavi ili informaciji, kao i razlog kojim se rukovodio kod postupanja (Evidencija 1).

Član 3. (Provjera u sistemu JIIS)

Prije postupanja po žalbama, prijavama o navodnim zloupotrebama i informacijama, nadležna služba u Sekretarijatu Centralne izborne komisije BiH putem Jedinstvenog izbornog informacijskog sistema (JIIS) provjerava status birača na kojeg se žalbom, prijavom ili informacijom ukazuje.

Član 4. **(Međunarodna pomoć u krivičnim stvarima)**

U skladu sa Zakonom o međunarodnoj pravnoj pomoći u krivičnim stvarima („Službeni glasnik BiH“ br. 53/09 i 58/13) Centralna izborna komisija BiH će radi osiguranja tačnosti, ažurnosti i ukupnog integiteta Centralnog biračkog spiska, incirati podnošenje zamolnica zemljama u kojima su registrovani birači za glasanje izvan Bosne i Hercegovine.

Član 5. **(Postupanje nakon štampanja Izvoda za glasanje izvan Bosne i Hercegovine)**

(1) Sve žalbe u smislu stava (3) i (6), prijave o eventualnim zloupotrebama i informacije kojima se ukazuje na netačnost Izvoda za glasanje izvan Bosne i Hercegovine, a koje nisu obrađene do dana štampanja Izvoda za glasanje izvan Bosne i Hercegovine, evidentiraju se u posebnoj evidenciji, koja se dostavlja Glavnom centru za brojanje (Evidencija 2).

(2) Evidencija iz stava (1) ovog člana pored podataka iz člana 3.10 Izbornog zakona BiH na kojeg ukazuje žalba, prijava ili informacija, obavezno sadrži i datum zaprimanja žalbe, prijave ili informacije i rubriku „napomena“ u kojoj će se evidentirati način postupanja u odnosu na svakog od evidentiranih birača u ovoj evidenciji, o čemu je odlučila Centralna izborna komisija BiH.

(3) Način postupanja iz stava (2) ovog člana odnosi se na sljedeće situacije:

- a) Glasač glasao nepotvrđenim glasačkim listićem, a u ime istog stigao glasački paket iz inostranstva. U ovom slučaju, vrši se verifikacija nepotvrđenog glasačkog listića, a glasački paket pristigao iz inostranstva u ime tog birača se ne upućuje u proceduru verifikacije i brojanja u Glavnem centru za brojanje, te se čuva kao dokaz radi postupanja u skladu sa članom 6.8 stav (2) Izbornog zakona BiH.
- b) Birač je dokazao da je pogrešno upisan u Izvod iz Centralnog biračkog spiska za glasanje izvan Bosne i Hercegovine u zemlji u kojoj nema boravište. Ukoliko je to moguće, ovom biraču će biti dozvoljeno ostvarivanje biračkog prava u najbližem diplomatsko-konzularnom predstavništvu Bosne i Hercegovine o čemu će Centralna izborna komisija BiH u svakom konkretnom slučaju donijeti posebnu odluku. Birački paket pristigao iz inozemsstva u ime tog birača se ne upućuje u proceduru verifikacije i brojanja u Glavnem centru za brojanje, te se čuva kao dokaz radi postupanja u skladu sa članom 6.8 stav (2) Izbornog zakona BiH.
- c) Birač iz stava (3) tačka b) ovog člana nije ostvario svoje biračko pravo glasanjem putem nepotvrđenog glasačkog listića, odnosno u najbližem diplomatsko-konzularnom predstavništvu Bosne i Hercegovine. Birački paket pristigao iz inostranstva u ime tog birača se ne upućuje u proceduru verifikacije i brojanja, te se čuva kao dokaz radi postupanja u skladu sa članom 6.8 stav (2) Izbornog zakona BiH.
- d) U svim drugim situacijama koje nisu taksativno navedene u stavu (3) tač. a), b) i c) ovog člana Centralna izborna komisija BiH će odrediti način postupanja, vodeći računa o svim specifičnostima konkretnog slučaja.

(4) Evidenciju iz stava (1) ovog člana, Centralna izborna komisija BiH redovno ažurira, i istu redovno dostavlja Glavnom centru za brojanje do dana utvrđivanja rezultata izbora.

Član 6.
(Stupanje na snagu)

Ova odluka stupa na snagu danom donošenja i primjenjuje se od 01.10.2020. godine te se objavljuje se na internet- stranici Centralne izborne komisije BiH.

Broj: 05-1-07-2-1231-1/20
Sarajevo, 19.10.2020. godine


